



Inatsisartuni ilaasortaq Anders Olsen, Siumut

/maani

21-09-2021

Suliaq nr.: 2021 - 15318

Id. nr. 68214320

Kalaallit Airports pillugu § 37 naapertorlugu apeqquteqaammut 2021-120-mut akissut

Asasara Anders Olsen

Inatsisartut suleriaasianni § 37 naapertorlugu Kalaallit Airports pillugu Naalakkersuisunut apeqquteqaateqarputit. Apeqqutitit uannit akineqartussatut innersuunneqarput. Apeqqutitit matuma kinguliani ataasiakkaarlugit allanneqarput, akissummillu malitseqarlutik.

Postboks 909

3900 Nuuk

Tif.: (+299) 34 50 00

E-mail: box909@nanoq.gl

www.naalakkersuisut.gl

Apeqqut 1. Naalakkersuisut siumut aalajangereersimappata mittarfiit sanaartorneqarlutik aallateersut unitsinneqarnissaannik pilersaaruteqartoqanngitsoq, taava misissueqqissaarnerit1 sumut atorneqarniarpat?

Akissut: Nassuiaammi siunertaasoq nassuiaaterpiami oqaaseqatigiinni siullerni allassimavoq:

"Naalakkersuisut mittarfiliortiternerit pillugit ammanerusumik pissuseqarnissamik kissaateqarput, aammalu nassuiaat manna atorlugu suliaassat ataasiakkaat siumut ingerlaneri pillugit nassuiaateqarusullutik."

Apeqqut 2. Nuummi Ilulissanilu mittarfissat 900 mio.kr.-inik naatsorsuutigisamiit akisunerunerat, qanga KAIR-imiit Naalakkersuisuniillu ilisimaneqalerpa? Tassani pineqanngilaq nalaatsornerinnakkut qanga tusagassiuutitigut saqqummiunneqarsimanersut.

Akissut: Nassuiaammi qupp. 5-imi allassimasutut, Kalaallit Airports International A/S-ip 2020-mi aningaasaleqqinnissamut pisariaqartitsiviusut allat paasivai.

Suliaq imatut ingerlasimavoq:

Kalaallit Airports International A/S-ip 2020-mi maajip qaammataata aallartinnerani mittarfiliortiterneri Naalakkersuisoqarfiit akimorlugit suleqatigiissitaq, Naalakkersuisut Siulittaasuata Naalakkersuisoqarfianit, Aningaasaqarnermut Naalakkersuisoqarfimmit aamma Ineqarnermut Attaveqaqatigiinnermullu Naalakkersuisoqarfimmit ilaasortaaffigineqartoq Nuummi Ilulissanilu suliaassat inaarsarneqarnissaannut aningaasartuutit tamarmiusut aallaqqaammut missiliorneqartunit amerlanerunissaat ingerlatseqatigiiffimmit naatsorsuutigineqartoq ilisimatippai.

5. maj 2020-p aamma 2020-mi septembarip naanissaata akornanni Kalaallit Airports International A/S-ip aamma Naalakkersuisoqarfiit akimorlugit suleqatigiissitat mittarfiliortiterneri aningaasartuutaanerusussat pingaarnersiorlugit pitsaassusii

misissornerqarput. Septembarip naanerani annertussusiliussat 900 mio.koruunit missaanniissasut erseqqissaatigineqarpoq.

2020-mi septembarip aamma novembarip akornanni Namminersorlutik Oqartussat, naalagaaffik aamma Kalaallit Airports International A/S piginnittut, taarsigassarsisoqassappat Kalaallit Airports International A/S-ip niuernermit aningaasalersuinerullu pilersaarutaanut sunniutissat pitsaassusiinik uppersaanissaq pillugu oqaloqatigiippat. Taassuma inernerisaanik Kalaallit Airports International A/S ingerlatseqatigiiffiup niuernermit aningaasalersuinissamullu pilersaarutip pitsaassusaanik uppersaanissamut peqquneqarpoq.

Kalaallit Airports International A/S-ip 1. februar 2021-mi niuernermit aningaasalersuinissamullu pilersaarut nutartigaq nassiuppaa, tassanilu allassimavoq ingerlatseqatigiiffiup nunap karsia akuutinngikkaluarlugu 900 mio. koruunit missaannik taarsigassarsinissamut aningaasaqarnera naammattumik isumannaassuseqartoq. Taamaalilluni nunap karsia aningaasaqarnikkut toqqaannartumik sunniuteqarfigineqassanngilaq. 1,4 mia. koruunit, Nuummi Ilulissanilu sanaartornermit nunap karsiani immikkoortinneqartut allanngortinneqassanngillat.

Tamatuma kingorna suliaq, Ataatsimiititalianut attuumassutilinnut inunnulu tamanut politikikkut inaarutaasumik saqqummiunneqarnissaa siunertaralugu piareersarpoq. Kisiannili ilisimatitsissuteqarnerup nalaani 16. februar 2021-mi Inatsisartunut qinersisoqarnissaa nalunaarutigineqarpoq, taamaalillunilu suliaq taamanikkut Naalackersuisuusunit suliarineqanngitsoorpoq.

Taamani Naalackersuisuusooq 16. februaarimi tusagassiorfinnut nalunaaruteqarpoq, taannalu mittarfiliortiternerit ingerlateqqinneqarnissaminnut nukissaqarfiullu arnerannut tunngasuuvoq.

Tassalu suliaq 16. februaarimi maanna Naalackersuisuusut suli 2021-mi qaammatit pingasukkaat aappaanni ivertinneqanngitsut tusagassiorfinnit, taamaalillunilu inunnit tamanit ilisimaneqalereerpoq.

Maanna naalackersuisuusut naalackersuisooqatigiinnissamik isumaqatigiisummi mittarfiliortiternerit ammasumik pissuseqarfigineqarnissaannik anguniagaasoq naapertorlugu nassuiaat matuma siuliani taaneqartoq, 25. juni 2021-mi tamanut ammasumik saqqummiunneqartoq aallartippaat.

Apeqput 3. Mittarfinnut silaannakkullu angallassinermi inatsisit ass. isumannaallisaanikkut qanga allanngortinneqarnikuuppat?

Akissut: Inatsit, naalagaaffimmi suliassaqarfimmut oqartussaasunit aalajangersarneqartoq, uani tamanit pissarsiarineqarsinnaavoq: <https://www.trafikstyrelsen.dk/da/Luftfart/Regler-og-tilsyn/National-lovgivning>.

Apeqput 4. Oqartussat mittarfinnut silaannakkullu angallassinermut piumasaqaataasa sakkortusinerat (myndighedskrav) qanoq mittarfinnik sanaartornermut sunniuteqarpat?

Akissut: Oqartussaasut piumasaqaataat 747,2 mio. koruuninut pineqartunut ilaatinneqartut nassuiaammi ilaapput. Nassuiaammi quppernermi 8-imi imatut allassimasoqarpoq: *"747,2 mio. koruuninut taakkununga immikkoortiterilluni nassuiaasiorsinnaannginnermut, neqerooruteqartitsinissat aammalu*

isumaqatigiissusiassat eqqarsaatigineqarnissaat peqqutaavoq. Entreprenørit siumoortumik siunertanut ataasiakkaanut aningaasanik qanoq amerlatigisunik immikkoortitsisoqarsimanersoq pillugu atuagaqarsinnaanissaat Naalackersuisunit kissaatigineqanngilaq. Aningaasat isertuunneqarnissaannut tunngavissaaruteriarpat, aningaasat amerlassusii tamanut ammasumik saqqummiunneqassapput.

Isertuussinissamik tunngavissaq atorunnaarpat aningaasartaliussat
immikkoortukkaarlugit Naalackersuisunit tamanut ammasumik
saqqummiunneqassapput.

Apeqqu 5. Mittarfinnut silaannakkullu angallassinernut Inatsisit allanngornerat (ændret lovgivning) qanoq mittarfinnik sanaartornernut sunniuteqarpat?

Akissut: Apeqqu 4-mut akissut takuuk.

Apeqqu 6. Mittarfiliortiternernut tunngavissat allanngorneri (ændrede forudsætninger) qanoq mittarfinnik sanaartornernut sunniuteqarpat?

Akissut: Apeqqu 4-mut akissut takuuk.

Apeqqu 7. Ilaasut qanoq amerlatigisut Kangerlussuarmut tikillutillu aallartarpat?

Akissut: Kisitsisit imatut isikkoqarput:

Ukioq	2018	2019	2020*	2021**
Tikittut	156265	155819	75338	50197
Aallartut	173597	177808	90679	53239

Najoqqutarisaq: Mittarfeqarfiit

*2020-mut amerlassusiliussat Covid-19-ip atugaanerani sunnerneqarput

**2021-mut paasissutissat taamaallaat ukiup affaanut siullermut tunngasuupput, taakkulu aamma Covid-19-ip atugaanerani sunnerneqarput

Tikittut aallartullu assigiinngissuteqarnerinut tunngatillugu tikittunut naatsorsukkat nalornissutigineqarsimapput, taamaattumillu Kangerlussuarmi ilaasut aqqusaartarnerannut kisitsiserpiaat ilaasunut aallartunut naatsorsukkanut ilaatinneqarput.

Apeqqu 8. Nuummi Ilulissanilu mittarfiit atulernerisa kingorna, sinerissami mittarfiit amigartooruteqarlutik ingerlalertussanut nunatta karsia kiffartuussinissamut isumaqatigiissutikkut qanoq annertutigisumik akiliuteqartalissava?

Akissut: Siunissami mittarfiit ilusiligaanissaanni mittarfinnik ingerlatsineq pingaartumik immikkoortut pingasuusut aqutugalugit aningaasalersorneqartussaavoq:

- 1) aallartarnermut ilaasunullu akitsuutit aqutugalugit atuisut akiliutaat.
- 2) angalariaatsit pitsanngornerisa kingunerisaanik pitsanngorsaaneq.
- 3) allaniit aningaasalersuisoqarnissaannik pisariaqartitsineq, kiffartuussinermut isumaqatigiissutit aningaasalersuiffiusulluunniit allat aqutugalugit tapiissutaasinnaasut.

Mittarfinnut amigartooruteqarfiusartunut tamanna aningaasalersuiffiusut arlaanniit matussusiiffiusinnaassaaq. Mittarfiit amigartooruteqarfiusartut ataasiakkaat pillugit

Mittarfeqarfinnut kiffartuussinissamut isumaqatigiissuteqartoqarneratigut tamanna pisinnaavoq, tamannalu pissappat ukiuni tulliuuttuni aningaasanut inatsisiliortarnerni tullerijaaarisoqartarnissaa pisariaqartussaavoq.

Nalunaarusiami "Mittarfiit annertusaavigineqarneranni inuiaqatigiit aningaasaqarnerannut sunniutaasussanik nalilersuineq, Alloriarneq 2"-mi, 2018-imeersumi Nuummi Ilulissanilu nunanut tamalaanut mittarfiit atorneqalerpata Mittarfeqarfinni ukiumut isertinngitsuugassat 60 – 75 mio. koruuninut missiliorneqarput. Tassalu Kangerlussuarmi isertinngitsuugassat taakkulu amerlassusissaat "*Nuummi aamma Ilulissani nunanit tamalaanit mittarfiit kiisalu Qaqortumi nunap immikkoortuani mittarfiup sananeqarnissaannut, ingerlanneqarnissaannut aningaasalorsorneqarnissaannullu killiliussatut piunasaqaatit pillugit Inatsisartut inatsisaat nr. 4, 22. november 2018-imeersoq*"-p 2018-imi naalakkersuisooqatigiinnermi, Siumukkut siuttuuffigisaanni saqqummiunneqarneranut akuerineqarneranullu tunngavigineqarsimapput.

Atuisut akiliutaasa, angalariaatsinik pitsanngorsaanerit kiffartuussinermullu isumaqatigiissutit akornanni oqimaqatigiissitsinissamut sinaakkusiussat maannarpiaq suleqatigiissitami, Naalakkersuisut Siulittaasuata Naalakkersuisooqarfianit, Aningaasaqarnermut Nunamullu Namminermt Naalakkersuisooqarfimmit, Ineqarnermut, Attaveqaasersuutinut Naligiissitaanermullu Naalakkersuisooqarfimmit, Mittarfeqarfinnit aamma Kalaallit Airports A/S-imit ilaasortaaffigineqartumi, Mittarfeqarfiit Kalaallit Airports Gruppen-ip ataani aktianik piginneqatigiiffittut allanngortinneqarsinnaanerannik piareersaallutik suliaqartumit pitsaassutsimikkut uppersarneqarput. Suleqatigiissitap aamma siunissami aningaasanut inatsisissanik suliaqartarnissamut atatillugu suliaq piareersarpa.

Apeqqut 9. Mittarfissat 900 mio.kr. saniatigut suli akisuneruleqqissinnaanerit naatsorsuutigineqarsinnaava?

Akissut: Naalakkersuisuniit naatsorsuutiginnisamik pissutsinik allanik ilisimasaqartoqalerpat, Naalakkersuisut ammanerunissamut politikkeqarnertik naapertorlugu tamanut ammasumik ingerlaavartumillu saqqummiussisassapput.

Neriuppunga qulaani allaqqasuni apeqquteqaatitit akineqartut.

Inussiarnersumik inuulluaqqusillunga



Naaja H. Nathanielsen